



Ávarp formanns Félagsráðgjafafélags Íslands

Steinunn Bergmann



Steinunn Bergmann
formaður Félagsráð-
gjafafélags Íslands

Kæru félagsráðgjafar!
Það eru forréttindi að fá tækifæri til að leiða okkar góða félag, en á aðalfundi 29. apríl 2019 tók ég við keflinu af Maríu Rúnarsdóttur, sem ákvað að stíga til hliðar eftir sjö ára starf fyrir félagið. Færi ég Maríu bestu þakkir fyrir hennar góðu störf.

Stjórn félagsins ákvað að breyta starfi verkefnastjóra í framkvæmdastjórastarf en Eldey Huld Jónsdóttir hefur gegnt því starfi frá árinu 2012. Félagsráðgjafafélagið er vaxandi félag með yfir 500 félaga og þar af eru karlar um 7%. Nú, eftir ár í starfi, lít ég til baka með þakklæti í huga og full tilhlökkunar að starfa með ykkur að málefnum félagsráðgjafar á Íslandi.

Kjarasamningar hafa öðru fremur sett sitt mark á starfsárið 2019–2020, en sem kunnugt er runnu kjarasamningar Félagsráðgjafafélagsins og fleiri stéttarféлага við ríkið, Reykjavíkurborg og Samband íslenskra sveitarfélaga út hinn 31. mars 2019. Félagsráðgjafafélagið var í samfloti með tíu öðrum félögum í viðræðum við ríkið og voru kjarasamningar undirritaðir 2. apríl 2020 eftir árs viðræður. Ekki náðust fram ýtrustu kröfur en í ljósi þeirra aðstæðna sem ríktu í samfélaginu vegna smitsjúkdóms (COVID-faraldurs) var ákveðið að ganga til samninga við ríkið. Viðræður við Reykjavíkurborg og Samband íslenskra sveitarfélaga standa enn yfir þegar þetta er ritað.

Félagsráðgjafafélagið var á sínum stað og sem fyrr haldið í samstarfi við Félagsráðgjafardeild Háskóla Íslands, Rannsóknastofnun í barna- og fjölskylduvernd (RBF) og Ís-Forsa – samtök um rannsóknir í félagsráðgjöf. Yfirskrift þingsins var „**Skiljum enga eftir**“ **Virðing** – **Virgni** – **Velferð** og voru þátttakendur ríflega 400. Dagskrá þingsins var fjölbreytt en lykilfyrirlesarar voru frá Noregi, Hollandi og Íslandi. Per Isdal, sálfræðingur frá Noregi, sem hefur sinnt meðferð fyrir einstaklinga sem beita ofbeldi, fjallaði um áhrif slíkrar vinnu á fagmanninn. Marieke Vogel, félagsráðgjafi frá Hollandi, sem hefur einbeitt sér að vernd barna, fjallaði um „Signs of Safety“-vinnuaðferð fyrir félags-

ráðgjafa en hún var einnig með heils dags vinnusmiðju um efnið daginn fyrir þingið, sem haldin var í samstarfi við Barnaverndarstofu. Jafnframt kynntu þær dr. Steinunn Hrafnadóttir félagsráðgjafi og dr. Ásta Snorradóttir félagsfræðingur niðurstöður rannsóknar meðal félagsráðgjafa á Íslandi. Þá gátu þátttakendur valið um 21 málstofu þar sem félagsráðgjafar fjölluðu um fjölbreytt verkefni á vettvangi auk rannsókna, sem sýnir þá grósku sem býr innan stéttarinnar.

Fagdeildir Félagsráðgjafafélags Íslands leggja grunn að faglegu starfi félagsins en þær standa fyrir reglulegum fræðslufundum auk þess sem stjórn leitar til þeirra við gerð umsagna um málefni sem tengjast sérfræðisviði þeirra. Nokkrar fagdeildir voru með málstofur á Félagsráðgjafafingi auk þess sem fagdeild í fjölmenningu stóð að vinnusmiðju um móttöku flóttamanna daginn fyrir þingið, í samstarfi við Samband íslenskra sveitarfélaga.

Alþjóða félagsráðgjafardagurinn 17. mars 2020 lagði áherslu á mikilvægi mannlegra tengsla (e. promoting the importance of human relationships) enda sýna rannsóknir að mannleg tengsl eru sá þáttur sem hefur hvað mest áhrif á heilsufar okkar. Alþjóðasamtökin hafa jafnframt vakið máls á áhrifum loftslagsbreytinga á jaðarsetta hópa. Þá hafa Evrópusamtök félagsráðgjafa vakið athygli á vaxandi félagslegum vanda í Evrópu, sérstaklega tengdum fólksflutningum. Félagsráðgjafar búa yfir vitneskju um þær afleiðingar sem félagslegur vandi hefur fyrir einstaklinga og fyrir efnahag þjóða og geta lagt mikið af mörkum til lausnar. Við stöndum nú frammi fyrir fordæmalausum tímum vegna smitsjúkdóms. Félagsráðgjafar eru heilbrigðisstétt og þó þeir sinni ekki hjúkrun eru þeir í tengslum við þá sem eru í hvað viðkvæmastri stöðu í samfélaginu og þá sem eiga á hættu útilokun og einangrun vegna faraldursins. Það er viðbúið að félagsráðgjafar muni á næstu misserum mæta afleiðingum löngu eftir að búið verður að ráða niðurlögum smitsjúkdómsins, því sálfélagslegar afleiðingar munu vara lengi eftir það.

Kæru félagsráðgjafar, hafið þakkir fyrir ykkar mikilvægu störf á öfgafullum tímum og gleymið ekki að það er grundvallaratriði að annast sjálfan sig til að geta sinnt öðrum.